



A-N-T-I

ALIANSA NASIONÁL TIMOR-LESTE BA TRIBUNÁL INTERNASIONÁL

Telephone: 77179655/77289241/77402231

e-mail: lanarra.del@gmail.com or maubere_oan@yahoo.com or moniz@jsmp.minihub.org

Deklaraun Konjunta

Loron Internasionál Direitu Vítima ba Lia los no Justisa: ANTI Ejize Estadu Timor Leste la-bele ignora vítima sira nia direitu

Loron 24 fulan Marsu nu'udar loron Internasionál Direitu Vítima sira ba lia-loos no justisa. Dedikasaun loron ne'e ba vítima violasaun direitu umanu sira nian deside husi Rezolusaun Konsellu Direitu Umanus ONU Nú. A/HRC/Res/14/7 iha tinan 2010 liu-ba.

Razaun no konsiderasaun Konsellu Direitu Umanus deside loron ne'e hanesan loron istóriku hodi fo valorizasaun ba Oscar Arnulfo Romero hanesan Bispo husi El Salvador ne'ebé ho nia dedikasaun, apoiu, brani no oferese nia vida tomak hodi luta no defende direitu vítima violasaun direitu umanu no ikus mai iha loron ne'e nia tenke mate tanba hetan oho. Tanba ne'e Nasoens Unidas konsidera no hili loron ne'e hanesan loron Internasionál direitu vítima sira ba lia loos no justisa.

Timor-Leste nu'udar membru foun ba comunidade internasionál ka membru ONU ba dala-191, mos nu'udar "**na'in**" ba loron ida ne'e, liuliu tan Timor-Leste nu'udar "**país vítima**" ba violasaun direitu umanu ne'ebé akontese durante tinan 24 okupasaun ilegal Rejime Soeharto Indonézia nian. Ne'eduni Timor-Leste mos iha dever moral atu selebra loron ne'e no ha'klaken ninian ispiritu hodi vítima sira nia direitu ba Lia-loos no justisa bele la'o ba oin, nune'e mos hanesan lisaun hodi bele "hanorin" jersaun foun atu labele halo tan ema seluk sai vítima violasaun direitu umanus.

Ezijensia ba direitu vítima violasaun direitu umanu ba lia-loos no justisa, la'os de'it atu satisfas eksklusivamente vítima sira de'it, maibé mos jersaun agora no futuro. Lia-loos ne'e nu'udar patrimoniu (riku-soin) históriku nasaun ida ne'ebé hakarak lao ba hodi la repete tan hanesan saida mak akontese iha pasadu. História la'os de'it kona-ba eroismu iha rezistencia ne'ebé nakonu ho aktu violénsia, maibé mos tenki abranje sofrimentu vítima sira, hodi nune'e ita aprende oinsa ema nian terus hodi la halo tan ema seluk sai terus.

"Lia-loos tenki deskobre, aprende no habelar ba jersaun agora no futuro. Ne'e duni, ita lalika tauk atu deskobre lia-loos no rekoñese ita nian pasadu ne'ebé "nakukun" no buka "falun-metin" ho pasadu eroismu de'it. Ita tenki onestu atu simu ita-nian pasadu hotu, hodi ita aprende atu ha'dook-a'an husi hahalok "loko-a'an"; dehan Vice Prezidente Asosiasaun Vítima Nasionál Timor Leste, Sra. Maria da Gloria

Nune'e mós direitu ba justisa, la'os de'it interese eksklusivamente violasaun direitu umanu sira nian de'it. Justisa ne'e nesesidade kriatura umana iha sa tempu de'it. Agora ita hotu mos sei "hambrok ba justisa" nomos jersaun futuru sei nesesita direitu ne'e mos.

Se ita laiha korajen atu hala'o justisa ba pasadu, maka imposivel mos ita-nia Estado bele hala'o ninian obrigasaun atu fornese justisa ba kazu sira atual nomos futuru (korupsaun, abuzu poder, violénsia domestika, ..sst).

"Prinsipiu justisa ne'e tenki kaer metin no labele "selok tun-sae" tuir gostu "elite" ka liuliu poder suspeitu sira. Problema laiha kbiit atu realiza justisa, la'os razaun atu ignora no viola prinsipiu ne'e. Kbiit atu realiza ne'e relativu no kompete ba obrigasaun membru comunidade internasionál hotu; dehan Sisto dos Santos, Coordenador Board ANTI

Komemorasaun loron ne'e atu hanoin hikas no fanu konsiensia lideransa estado hotu kona-ba importansia Estado-membru sira (inklui Timor-Leste no Indonézia) ba sira nia obrigasaun atu foti medidas hodi fornese vítima violasaun direitu umanu sira nia direitu ba lia-loos no justisa.

Tanba ne'e, ami ne'ebé hamahan an iha Aliansa Nasionál Timor Leste ba Tribunál Internasionál (ANTI) hamutuk ho vítima no familia vítima ejize ba:

1. Parlamentu Nasionál atu kumpri sira nian dever konstitusionál hodi halo polítika no lejislasaun hodi nune'e Estadu Timor-Leste bele realiza ninia obrigasaun ba vítima sira ne'ebé mos nu'udar sidadaun timorensen nian direitu ba lia-loos no justisa;
2. Husu ba Parlamentu Nasionál atu reajenda prosesu lejislasaun ba projetu lei Programa Reparasaun no Institutu de Memoria ne'e nu'udar medida nesesáriu atu realiza obrigasaun Estadu nian hodi valoriza vítima sira nia sofrimentu ne'ebé seidauk iha solusaun, iha segunda Lejislatura, asuntu Veterano sai hanesan agenda prioridade no konsege iha solusaun tanba ne'e ami laran metin iha lejislatura agora sei fo prioridade ba asuntu vítima;
3. Husu ba Estadu Timor-Leste atu asina no ratifika Konvensaun Internasionál ba Ema Lakon Forsadu atu bele fasilita repatriasaun ba timoroan sira ne'ebé militar Indonéziu lori halai ba Indonézia durante okupasaun Indonéziu;
4. Husu ba Governu Timor-Leste hodi haree no kumpri memorandu entendimentu ne'ebé asina entre Governu Timor Leste no Indonézia kona-ba rekomendasaun KVA nian liliu hari'i Komisaun Ema Lakon atu buka tuir Timor oan sira ne'ebé lakon forsada durante okupasaun Indonézia nian.
5. Husu ba comunidade internacional liliu Konsellu Seguransa ONU atu labele husik nia responsabilidade ba prosesu krime kontra umanidade ne'ebé akontese iha Timor-Leste iha tempo pasado nune'e bele hakotu korenti impunidade iha Timor-Leste no rai seluk.

6. Husu apoio solidaridade organizasaun internasional hanesan Amnesty Internasional, ETAN, Forum Asia, AFAD, ICTJ, TAPOL, ICG hodi kontinua luta no halo advokasia ba krime kontra humanidade iha Timor-Leste ne'ebé ONU totalmente falla atu rezolve.

Dili, 22 de Marsu 2013

Sisto dos Santos
Koordenador Board ANTI
Rua Serpa Rosa, Farol, Dili
Timor-Leste
Office +670-331-3323
Mobile +670-77179655
lanarra.del@gmail.com

Aliansa Nasionál Timor Leste ba Tribunál Internasionál (ANTI)

1. Komite 12 de Novembru
2. Asosiasaun Vítima Timor Leste
3. Asosiasaun HAK
4. Judicial System Monitoring Program (JSMP)
5. ACbit (Asosiasaun *Chega* ba Ita)
6. Sekretariadu FONGTIL
7. Asia Justice And Rights (AJAR) Timor Leste
8. Front Mahasiswa Timor-Leste (FMTL)
9. MDI (Mata Dalan Institut)
10. Haberan Institut
11. KSI (Kadalak Solimutu Institut)
12. Ita Ba Paz
13. Fokupers
14. CDI
15. KBH (Knua Buka Hatene)